

TRIBUNA POLITICA

Quai na gida betg l'ambient

DA SILVA SEMADENI,
CUSSEGLIERA NAZIUNALA
PS/GR

Stop a la surpopolaziun – per mantegnair la basa d'existenza natirala»: In bel titel ed ina buna intenziun, ma quai engiona. Davos quest mantè verd sa zuppa puspè in' iniziativa encunter ils esters en Svizra. Ed anc pli malign: Cun sias propostas distira l'iniziativa dals vairs problems da l'ambient e dad ina critica seriosa da la creschientscha illimitada. L'iniziativa Ecopop vul proteger nossa «basa da viver natirala» cun limitar radicalmain l'immigraziun e cun utilisar 10 pertschient da l'agid svizzer als pajais en svilup per preservativs. Omaduas mesiras na vegnan betg a cuntanscher lur finamiras ecologicas.

Soluziun d'insla nunduvrable

Ecopop confunda raschun e consequenza. Nus reducim la contaminaziun da l'ambient mo cun in diever persistent da nosas resursas. Consumassan tut ils pajais uschè bleras resursas sco la Svizra, lura duvrassan nus bunamain traits planets per cuntentar ils basegns da l'entira umanità. Igl è noss sistem economic e noss stil da viver che pericliteschan natira ed ambient. Per mantegnair nossa «basa da viver natirala» è dumandada ina politica ecologicamain cumpatibla en tut ils champs. Necessarias èn



mesiras ecologicas concretas sco per exempel la strategia d'energia 2050 che vegn a vegnir tractada il december en il cussegl nazional. Tgi che blocca ils cunfins cun mesiras extremas na protegia betg l'ambient, periclitescha dentant fermamain l'economia en Svizra. Ultra da la quota fixa e radicala per l'immigraziun pretenda l'iniziativa er ina visada dals contracts bilaterals cun l'Uniuin europeica (UE). Uschia ristga Ecopop che l'isolaziun da la Svizra s'augmenta a moda gravanta. Las tractativas dal cussegl federal cun l'UE s'enter il 9 da favrer 2014 daventassan obsolete, la relaziun cun l'UE fiss cumplettamain disturbada. La soluziun d'insla na è ni ecologicamain ni economicamain ni politicamain giustifitgabila.

Malgist e fauss

Er l'intenziun da vulair regular las naschientschas en il Terz mund na

vegn betg ad avair success. Mo cun distribuir preservativs ins na reducescha betg l'augment da la populaziun. Nus savain en il fratemp: La quota da naschientschas sa sminuescha sche las dunnas èn furmadas meglier e sche lur cundiziuns da viver èn meglras. Quai era er en Svizra uschia. La quota da naschientschas è sa reducida cuntinuantamain ils davos decennis. Il dumber dals uffants è sa sbassà cun l'augment dal bainstar. Las finamiras dad Ecopop na persvadan betg e contradin cleramain a las intenziuns actualas da la cooperaziun al svilup che sa basa sin ils basegns da la populaziun locala e betg a noss agens interess sco durant il temp dals missiunaris e dal colonialissem. Ultra da quai survesa l'iniziativa dal tuttafatg la giustia sociala. Oz consumeschan ils 10 pertschient da la populaziun mundiala bainstanta var 30 pertschient dals combustibels fossils. Ils 30 pertschient povers dal mund dovran pli pauc che 10 pertschient. L'iniziativa dat la culpa da la grevizza per l'ambient als pli povers. Quai è malgist e fauss!

L'iniziativa Ecopop è l'in'emprova nunduvrable da vulair proteger l'ambient sin donn e cust dals povers e dals esters. Ed ella maina nus anc dapli en la via tshorva da l'isolaziun. L'iniziativa Ecopop merita ila 30 da november ina refusa clera.